

四庫全書

子部

欽定四庫全書

子部

珊瑚網卷三十二至四

詳校官中書臣沈鳳輝

編修臣程嘉謨覆勘

總校官進士臣朱

鈐

校對官中書臣

吳翼成

謄錄監生臣

丁鳳儀

欽定四庫全書

珊瑚網卷三十二

明 汪砢玉 撰

名畫題跋八

高文簡倣老米青綠雲山卷

青山半晴雨遙現行雲底佛髻欲爭妍正空勤梳洗
房山高彥敬作於雲巖精舍

吳仲圭云空山兮寂歷石氣蒸兮龍葱人家兮木末

望雞犬兮帶水流花謝淹冬春兮無窮江亭兮石嫩
靄靄兮深松山中人兮歸來颺長嘯兮天風 彥敬
尚書弄襄陽墨戲作此圖沙彌老人傲招仙之辭作
此贊白日寒冰手皴龜拆雲川居士應笑我多事饒
舌 至正戊子正月

高彥敬烟嶺雲林

西村元不隔西泠未晚人家戶半局要覓巢居新閣處
試從烟雨喚樵青 句曲外史張雨

江籬漠漠水泠泠林下幽人戶未扃
睡熟不知春雨過起來雲外數峰青
徐賁次韻

一個茅堂何處小橋古木溪灣但見山青雲白不知天上人間
奕

漠漠層巒障曉嵐參差沙樹似江南
眼明見此房山筆不減當年海嶽菴
逃虛子

尚書生長燕臺下慣識風沙草漫野
何由得見山水鄉烟嶺雲林遠能寫
平時四海作宦游高興最愛江南秋

雪溪清曉剡溪晚間解征轡尋扁舟此中謝屐曾經處
半是啼鴉棲鶴樹斷橋旗下問農歸遠寺鐘邊訪僧去
風流一沒歲未遙坐覽遺跡成前朝何當徧覓畫中景
聖恩已許作漁樵高君彥敬號房山拜尚書公畫山
水無不佳者未若此幅大有米家意趣靜菴張別駕持
此畫索余拙作故賦一篇以塞請耳然余老草不工可
笑時洪武庚戌歲三月五日渤海高啓題

梅之紅其色也海棠之香其韻致也畫之濃淡其神彩

也高尚書潑墨濃淡成山林烟雲靈幻神彩飛動其上
苑朱梅昌州香海棠乎真散聖安禪自能竒逸 萬厯

丙午小春初度日西吳汪珂玉題于自韻山

丁巳春余以高彥敬烟嶺雲林與趙文敏杏花書屋倪
元鎮翠竹喬柯王叔明鐵網珊瑚及王元章墨梅同供
一室時董玄宰太史過齋頭見之因評房山云此幅墨
氣絕佳其竒真過南宮猶唐詩之於文選也余請即題
是語會諸客踵至未果後為姑溪友人賺去不憚千里

追索不啻珠還合浦也砢玉記於江村

趙集賢林山小隱圖

大德八年十二月廿日子昂

有吳郡徐霖子仁
林山隱序不錄

茗水秋風動白蘋青錢學士玉為人山林物外別成趣
造化手中殊有神寒具漫傳誰點染京華高卧不埃塵
馮君韞匱長懷寶莫負當時此寫真 宗道得此圖因
以自號其向歸可知矣余賞之不足附記一律所幸亦
同作卷中人耳癸亥重九吳郡祝允明志

蘇子愛奇石雪浪號齋居米氏寶晉墨標榜亦復如瞻
茲小隱圖按境結林廬於焉寓祖述雅致私契余因名
寶豈戾匪云賦子虛溪山在屋上流水走堦渠衆鳥鳴
樹顛亦可觀跳魚耕釣托遠心城市即村墟知子日無
事垂簾惟讀書 長洲沈周

展圖忽有契佳境留待人金陵山水處松雪與傳神子
非滑稽口金門為弄臣亦非南昌尉忤世跡埋埋但甘
布衣老供稅作齊民白雲自怡悅暇則琴尊親雖遭孔

璋筆移文空爾陳 嘉禾呂憲

松雪此圖全法董北苑大著色於絹素上溪山重叠
漁舍秧畦不異武陵風景真肥遯之區恍然如隔世
也 世賢子

趙承旨玄真觀圖

在絹素上重青
綠山水掛幅

對此山水咏使人塵慮消况茲構真館燕坐遠煩囂
青林蔭石牖素雲冠山椒松風和澗泉雜佩生瓊瑤
焚香玉女降長齊百靈朝仙道本不遠清都亦非遙

自嘆衰耆年頗費猿鶴招安得生羽翰從予以逍遙

子昂

玉堂圖就幾經年秘錄清修不卧氈心想遠期三島客
夢魂不到九重天逍遙風月山中事故蕩形骸物外仙
誰信長生真有訣豈知林下可通玄南屏山夷簡

華髮驚心引暮年久捐燈火伴吟氈迂疎願棄人間事
放浪難拘甕裏天丹濟有時飛姹女酒酣長日夢遊仙
從今已謝吞腥客抵就洪崖訪太玄關繡

天慶重啼白髮年
儒冠便脫卷吟羶
蒼龍復佩遊三島
玄鶴還騎朝九天
靈運誰云先作佛
稚川自信後來仙
逍遙今出塵寰外
應笑揚雄尚草玄
京兆宇文公諒
樂道幽人已
有年蒲團應勝紫茸羶
堦前影轉花當檻
松外聲高鶴在天
盃酒久疎名利客
經書惟考古今仙
居塵亦棄林泉趣
何日相依細論玄
碧虛道人盛昌
月林棲遯樂餘年
芳草綠苔為坐羶
擬駕雲軒遊碧落
還陪羽客聽鈞天
興隨緱氏山頭鶴
夢入邯鄲枕上仙

從此超然埃壚表好尋真侶覆玄玄 盧充穎

趙子昂玄真圖不流外郡余慕之久觀在玲瓏山去郭
北一十八里相傳其山產玉怪石萬數旅乎如林孤峯
拔秀繚繞雲巒中多洞壑懸崖崖上有沈休文書洞天
福地四字後為取石者鑿損舊有雨花菴玄真觀長壽
鳴韻石書院巔有漏月峯子昂築一精舍於其旁供養
中峯大師每顧大師必小憩玄玄堂故得子昂遺跡甚
富飛甍華屋鐘鼓相聞迄今並廢按觀建自吳越王世

出得道真人號玄玄子者諱龍字雲卿乃妙應淵得慈
濟元君之裔子昂族叔也能詩好道中年棄家入山集
道藏黃白異術善呼喚風雨而武宗屢聘不就遂採藥
海上不知所終至元間谷翁真人從天台忽遇師于山
陰道山叩玄乞道默無片言惟授丹一粒而去故谷翁
亦得蟬脫云此圖向鎮藏館中後為冰壺先生賺出復
易數姓令得覩於幽蘭軒樹石精雅墨妙詩清可為子
昂生平得意之作也寶諸寶諸 已酉穀日弁山老人

高輝志

趙文敏畫謝幼輿丘壑圖

倣趙千里
着色橫卷

黃塵汚人廊廟具蕭散風流誰比數清言善畫浪相傳
遺恨千年機上女 吳興姚式題 筠菴

昔顧長康畫謝幼輿於巖石裏人問其故答曰幼輿
一丘一壑自謂過之故宜置此子丘壑中也觀其清
逸標致固足嘉尚然能確守臣節當時同幕罕有及
之者今松雪翁後數百載心領神會作為此圖最是

位置有方筆意奇妙使長康復生見此必當點頭

東廬玉琦

一丘一壑絕塵坐看青山出白雲可使玉堂揮翰手
却疑大小李將軍 鄧榆木之

身形似鶴鬢毵毵消得松風置一龕幸自清清好山色
無緣祇有幼興堪 虞集

論者可方便亮何如丘壑自專幸甚嘯歌不廢風流圖
畫猶傳 宋无

右先承旨早年所作幼輿邱壑圖真跡無疑拜觀之
餘悲喜交集不能去手無言師宜寶之 雍謹書

宜著山巖謝幼輿鷗波落月夜窻虛虎頭癡絕無人識
把筆臨池每自娛 倪瓚

洪武辛未夏六月十又二日三山周斌西甌趙友士
李鐸上饒梁鵠同觀于建庠之春風堂

萬厯丁未陳繼儒觀於項孟璜萬卷樓

此圖乍披之定為趙伯駒觀元人題跋知為鷗波筆

猶是吳興刻畫前人時也詩書畫家成名以後不復
模擬或見其杜德機矣董其昌觀因題己酉九月晦
日

趙松雪作淵明歸田圖

青綠山水橫
卷子昂款

陶令厭處貴處貧懷反開到官六十日賦辭歸去來輕
舟颺素波浦淑相沿洄微風吹襟袖飄飄若埽趨衡宇
方在瞻候門見僮孩孤松自堪撫三徑從荒萊容膝諒
已安豈受外嫌猜斯人有高蹈千春覽芳埃 允文

淵明千載人懷惟遇酒開竟辭五斗米浩然賦歸來扁
舟下七澤蕩槳聊沿洄頭上漉酒巾鬢髭已皤耄到家
俱歡迎老稚雜童孩入門列罇壘相與鋤蒿萊松雪妙
點筆圖成無疑猜誰云萬古後磨滅同塵埃 趙承旨
此圖設色精妙師伯駒而雜以士氣又非止於伯駒也
俞仲蔚詩亦冲遠蕭散可愛因遂和之 茂苑文嘉

陶令罷彭澤正及黃花開有酒不辭濁長歌歸去來千
載義熙波誰能溯其洄學士葆天真椎髮白毡毳回首

感宗周擲國一嬰孩藍輿蹇柴桑紫騮捷蓬萊時睽跡
更殊疇能不見猜惜哉丹青美托尚隔雲埃 趙吳興
畫陶彭澤歸去來縱極八法之妙不能不落豎儒吻蓋
以永初之不臣宋與至元之仕元趣相左耳若其風華
秀潤標舉超逸虎頭點拂雲麾烘染所謂趙郎并其性
情而得之者與彭澤人品文章真足三絕又不當以此
論也余詩為惡韻所窘不免墜豎儒口業令嗜古見之
其不罵為殺風景者幾希書畢一笑 弇州山叟王世

貞

弇山題跋載四部彙令得見此卷知此公鑒裁甚確

口業自懺又是翻公案語 其昌

趙文敏白描淵明像後行書歸來辭

在自製粉
牋上橫卷

大德四年春二月吳興趙孟頫書

既書歸來餘興未盡乃作竹石淵明亦當愛此耶

虛館坐清曉高秋零露時佳菊秀可餐寒葩含晚滋芳
馨發孤思寫此歸來辭餘興猶未已玄玉生瓊枝孰謂

公子懷不與幽人期撫卷三嘆息係年非義熙姑蘇

王行

典午山河已莫支先生歸去自嫌遲寄如小草連天綠

剛刺黃花一兩枝沈周

右元趙文敏公手摹晉處士陶靖節先生像兼錄其
歸去來辭翰墨精妙楮隙復補以竹石且謂淵明亦
當愛此豈謂其辭中偶不及此耶讀其辭想見其為
人文敏公之尚友吾亦想見之矣第靖節之孤松卓

有定見而文敏公之愛或博而不專非後學可輕議也錫山鄒松石翁珍圖書甚富而於此尤珍之吾亦想見其尚友矣然獨出以示余豈亦謂知辭中趣耶書質諸有識者 弘治己未仲秋後二日 華亭後學錢福誌

松雪書歸去來辭前作淵明像後餘興未盡又作竹石其風流瀟散可以想見予曾見人得一摹石乃東坡作銘自書後亦作小竹以盡興二公之文采情致

大畧相類然也此松雪卷有王行題王行元末人沒
於難詩亦清雅錫山鄒氏家藏 正德癸酉四月朔

鄧陳沂志

陳氏魯
南朱文

淵明曠世逸材出處舒匹之者鮮矣然耻向官折
腰達人每恨其禍豈先生託此以發歸來之興耶撫
故園而不歸殉微官以自失先生固亦齒冷也此卷
乃松雪真跡舊為錫山鄒氏珍藏今歸之楊氏七檜
山房癸巳夏蘇門山人叔嗣赴山西省燈下醉題

東
數

白文
印

松雪作淵明像予見者數幅矣皆不若此卷為佳所
畫歸去來辭用筆尤精不類他本其紙亦松雪齋自
製箋粉中隱起有八分書子昂二字可證也卷末復
作小竹石能令人想見古人雅致極為可愛舊為錫
山周炫家藏嘉靖戊子夏予寓蘇王氏水閣中作溪
光詩成炫從弟煌偶見之求書一通以去更歲餘
煌忽來余家自言攜此詩歸得消其家門骨肉之禍

其事有出於意料之外者因以此卷為贈予辭之再
四委之而去瓊瑤之報甚可愧也甚可笑也 癸卯

歲十月廿日五川居士楊儀書於萬卷樓中

楊夢
羽氏

華陰
世家

趙魏國臨義獻像卷

僕於京師見周文矩畫義獻像歸而摹之時皇慶二年

夏五月也 吳興趙孟頫題

後為姚公綬作義獻二傳又有楊循吉呂憲諸人跋

崇禎戊辰秋此卷在予家數月玉水記

松雪翁桐陰高士圖

延祐泰年十月八日子昂畫

玉立桐陰十畝蒼托根何必在朝陽迎風簌簌秋聲
早灑雨陰陰月色涼勝事只消琴在膝野情聊倚石
為牀高人自得坡頭趣不為花開引鳳凰 古涪鄧
文原題

又玩花仕女圖

絹素上重
着色掛幅

至元 年 月

作翫花仕女圖子昂

小楷書

此余少年所作今十餘年矣歲月易邁悲夫子昂再題

篆書

是圖為項又新家物董玄宰嘗共余過之時懸畫於
讀易堂之松軒玄宰翫賞不已曰似此光景應為管
夫人寫照耳聞松女徐安生曾做其意作惜花春起
早麗人披霧縠綰結於眉前薄映雪膚淺靨落紅苔
翠憑欄看牡丹綠竹叢繞其後露華尚滴滴也余亟

覓之不得無何人新物故所藏多散逸余得其書畫
數拾種趙筆其一焉紅亭翠篠間高峯兀立姚黃魏
紫參差其下玩花人正與徐娘當年所寫惜花人相
若因念安生遺艷未知落誰手而又新墓木已拱不
能不動念歲月易邁同文敏公之悲感云 封禺添
屬玉水汪珂玉識于月香居

趙承旨停琴撥阮圖

項子京題籤
雙幅卷堂畫

大德五年秋八月吳興趙孟頫作高逸圖

重青綠雲山巖下正面坐一高士葛巾深衣背面坐
一高士黑冠撥阮右有大松二樹樹旁童子駕髻大
袖雙結手捧石榴一盆山足多鹿慈花樹根細楷書
款脉望生記

又杏花書屋圖

余得後未幾而
去詩款俱失記

書法二王畫法顧陸自宋元名家得其法者有幾而松
雪翁乃兼之今觀此圖綠陰青樾紅雪飄香幽人兩兩
向書屋敲落日看杏花種種入神境更靚妝明媚仍

不失淡掃蛾眉之致有顧陸不得專美於前矣固能榮

際五朝名滿四海也歟玉水子識

萬曆乙卯冬日

趙榮祿水村圖

在紙上水墨寫意天啟壬戌春玉觀於陳氏交園閣

子昂水村圖學摩詰在王敬美太常家文太史臨摹一卷如出趙手予於白下得之眉公陳繼儒

子昂春郊挾彈圖

公子翩翩出大堤玉驄踏碎落花泥叮嚀莫打黃金彈
恐有慈烏枝上棲金華宋濂

洛陽二月百花紅金谷春閒步障空
匹馬閒行芳草地
金丸十二盡皆空
胡儼若思

趙松雪宋宗室畫唐馬稱第一至令筆跡儼若生張弓
彈雀意氣橫會將文墨動元主拜官翰林貴無比詩辭
婉麗字風流千金未許易片紙金蓮醉送玉堂仙父子
歸來共被眠錦纜牙檣非昨夢豈無十畝種瓜田李潭
州文丞相口血模糊尸鐵強一瓣香為有此何人慷慨
崖山死董狐有筆直如絃元宋分明兩青史
至正十

年十月一日余過金華訪隱直雪坐草堂上有客自青
城來亦同居客邸夜坐焚譚出此挾彈圖命題雪寒筆
凍書不成字見者掩口 黃潛題

手挽青絲跨玉驄乘涼挾彈落花風應知田野經行處
盡在咨詢一念中 黃花老人

誰畫開元玉雪驄黃門待駕驟春風南薰殿上承恩日
只有車書四海同 虛白道人

草軟坡平午樹涼玉驄挾彈過山陽曾知亦有無閒者

馬上雞聲滿地霜 胡廣

趙吳興挾彈走馬圖余以丙申歲得之武林是時又有支遁洗馬圖亦吳興筆今皆與好事者相易古畫蓋余好山水于畫馬非所習我用我法耳 董其昌
戊申重題於雪浪軒

趙吳興秋原牧馬圖

淺着色在絹素上馬凡有五

健馬奔泉如渴虹活馬浴水如游龍竦身作勢蹴厚地
仰首噴沫生長風倦思滾塵痒磨樹似是馬牙通馬語

莫將意態問丹青
天機正在忘形處
西涯

趙文敏秋郊飲馬圖

皇慶元年十一月子昂

右趙文敏公秋郊飲馬圖真跡予嘗見韋偃暮江五馬圖裴寬小馬圖與此氣韻相望豈公心摹手追有不期而得者耶至其林木活動筆意飛舞設色無一點俗氣高風雅韻沾被後人多矣
奎章閣學士院
鑒書博士柯九思跋

趙氏三世作人馬圖長卷

在楮上
最精

元貞二年正月十日作人馬圖以奉飛卿庶訪清玩吳興趙孟頫題

右第一幀子昂畫奚官牽澹黃馬西向

至正十九年己亥秋八月余寓武林一日韓介石過余道松江同知謝伯理雅意俾介石持所藏先平章所畫人馬見示求予於卷尾亦作人馬以繼之拜觀之餘悲喜交集不能去手余雖未識伯理嘉其高致故慨然為

作以授介石歸之伯理云 趙雍書

右第二幀仲穆畫番人牽驄馬西向

先大父魏國公所畫人馬圖裝潢成卷復請家君作于
後而亦以命余竊惟伯理之意豈欲侈吾家三世之所
傳歟自非篤於精雅不能用心若此也遂不辭而承命
時至正己亥冬十月望日也承事郎江浙等處行中書

省檢校官麟識

右第三幀彥徵畫奚官牽玉花驄西向

吳興趙公文章政事見重前代又以其餘以適情於翰墨之內故字畫之工點染之神妙天下而子孫亦克承其志焉清江王氏希和持其所藏公家三世所作人馬圖以示余蓋自子昂公為之祖仲穆公為之子彥徵公為之孫觀其顧視隨立尊卑秩然親誼藹然然後知名賢措思運筆雖於圖寫之末而寓乎天理人心之正使後人於一展卷之頃孝敬之心自不能不興起於其衷也况蘭筋麴膝方首厚蹄目如懸

鈴光流紫電奇情妍態宛如鏘如璫如翔如實可以
充天閑而鳴和鸞也又何必伯樂之經九方臯之法
然後可以見之哉希和今世名家素勤詩禮之教鄉
先生稱道之者日益著是猶驥有其德而又得其所
養者它日充天閑鳴和鸞今將於此圖而徵希和之
所至也再閱是圖敬書於後時永樂元年冬十一月
五日將仕佐郎臨江府儒學教授錢塘沈大年

清江王均希和所藏松雪齋三世人馬圖暇日持以

示余余獲拜觀先朝文獻之懿繼述之雅亘古今而
希有也楚書曰楚國無以為寶惟善以為寶希和寶
此以傳家其亦善人也三肅以還珍重珍重永樂三

年春龍在乙酉三月廿日前進士胡誠拜書

集賢長
子鳳字

允文畫蘭竹與迺父
亂真集賢每題作已

趙子昂仲穆彥徵三馬圖

延祐五年九月既望畫於大都寓舍子昂

右第一幀趙魏國畫青驪一疋

至正十九年歲己亥秋九月畫於龍華寶閣仲穆

右第二幀趙總管畫玉花驄一疋

至正庚子十月初吉為雪庭作于錢塘龍筆閣彥徵

右第三幀趙知州畫赤驥一疋

僧房曾見寫麒麟人已云亡紙墨新寂寞九原無弔處

至今猶見執鞭人 驥子生來骨相奇滿溝汙血落胭

脂空門縱有馱經日得似牽過白玉墀 廬陵張昱為

雪庭禪師題

右湖州路總管趙公仲穆其子莒州知州趙彥徵所畫
一馬氣韻精神各得其妙總管筆法得曹將軍為多知
州筆法得韓幹為重獨文敏公兼曹韓而得其神妙此
所以名重千古無愧前人雪庭禪師與總管公為心交
父子之間同為知己王蒙在文敏公為外祖總管為母
舅知州為表弟豈敢品題哉實識悲感耳 王蒙謹書
松雪當年稱獨步子孫今日繼遺風香凝淡墨連錢碧
色染秋毫汗血紅濟濟奚官顏似玉昂昂龍種氣如虹

春風滿轡初牽出對立長鳴冀北空

燕山哈珊沙

下用

朱文子

山圖書

吳興妙筆傳家世總畫天閑汗血駒萬里歸來秋露曉
圉人牽去牧龍芻太守舊圖如璞玉拾遺新畫抵南
金玉驄已向天閑老赤驥猶懷萬里心大食哲馬

郭石之題趙文敏畫馬云世人但說李龍眠那知已出
曹韓上文敏見之謂曹韓固不敢當使龍眠在固當與
抗衡也其自許如此錫山安君嘗得其子集賢諸孫彥

徵畫聯為軸王叔明題其後並論其父子筆法所出而尤甚稱文敏得曹韓之妙顧卷中無文敏之筆非闕典歟安君乃別購文敏一馬標諸卷首遂成合璧持來示余俾題其後於戲曹韓龍眠盛矣然其後皆無所聞豈若趙氏祖子孫三世具于一軸之中而並臻其妙殆古今一見耳豈曹韓諸人所得而擬耶若安君者其亦知所尚哉

安君名國字民太
號桂坡錫山人

嘉靖壬辰三月既望文徵

明題

趙魏國雙馬圖

飛騰自是真龍種健筆何年貌得來
照室神光欲飛去
秘圖不敢向人開
至正二年四月廿二日子昂

舊圖如璞玉遺墨等南金
莫向天閑老猶懷萬里心

大食哲馬

天閑曾識玉花驄
神駿驍雄萬馬中
老去人間空見畫

王孫遺墨動秋風
林鏞

大宛貢馬從西土來識天家十二閑
駿骨不居千里後

黃金已在築臺間 雲東逸史

如鹿如龍出宛西 竹批雙耳玉為蹄 大宛遠貢天朝用
牽入君門不敢嘶 江陰卞榮

西極飛來八尺龍 方臯一見萬羣空 太平時節無征戰
辜負華山汗血功 趙吳興畫馬真與韓曹抗衡此卷
尤為合作 後有雲東題咏 必江南好事家所藏可寶也
其昌

趙承旨番馬圖

至大三年九月廿一日子昂

一馬形軀百法全生時靈氣取山川英雄正用同生死

那忍無聲立仗前

海粟

下有怪怪道
人朱文印

京口郭畀天錫敬觀松雪翁唐番馬圖

神駒初墮地雷電飛海水三歲不敢騎萬里獻天子

翰林直學士虞集題

奎章閣鑒書博士丹邱柯九思敬仲審定

曲江洗刷雲滿身雄姿逸態何超羣眼中但覺肉勝骨

幹也合讓曹將軍嗟哉令人畫唐馬藝精亦出曹韓下
玉堂學士重名譽一紙千金不當價山窓擁雪觀畫圖
據鞍便欲擒於菟天厩真龍有時有老杜歌行絕代無
史官察役士安

趙松雪作二胡羊逸筆

題跋已刻六硯齋三筆
反遺其自跋因補此

予昂肖物之妙無所不造極此二紙乃其偶作而宛然
置人于黃沙白草間評者紛紛徵蘇卿事我恐此妙趣
正復當面蹉過也吾深嘆其亡羊 春波竹懶李日華

趙榮祿畫杏花鵲鵲并題

余嘗泛舟溪上因過下若時值杏花盛開溪邊鵲鵲黃色可愛恍如徐熙畫中行也乘興作此以記歲月云至大二年二月九日 子昂

趙魏公落花游魚圖

溶溶綠水濃如染風送落花春幾多頭白歸來舊池館閒看魚泳白漚波 延祐三年二月六日春雨初霽溪光可人乘興作落花游魚圖就賦詩其上殊有清思耳

進之在坐以為何如吳興趙孟頫

趙集賢飛白石墨竹

絹素上
掛幅

近水秋山兩岬青
明朝歸去獨揚舲
平生是箇知音客
纔過柯亭子細聽
子昂

管夫人題漁父圖

人生貴極是王侯
浮利浮名不自由
爭得似一扁舟弄
月吟風歸去休
管道昇

渺渺烟波一葉舟
西風木落五湖秋
盟鷗鷺傲王侯
管

甚鱸魚不上鉤 趙孟頫

又懸崖朱竹掛軸

網得珊瑚枝擲向簷簷谷
明年錦裯兒春風生面目
朱竹古無所本宋仲溫在畫院卷尾以朱筆掃之故張
伯雨有偶見一枝石竹之句 楊維禎

瀟灑三君子是伊親弟兄
所期持大節莫負歲寒盟
赤城陶君故家子也余寓西湖之東九成時來會談論
竟日退有不忍舍者其仲季皆清爽真芝蘭玉樹百十

晉之王謝家也遂題而歸之 己丑夏五月二十二日

會稽王冕

又畫梅二幅

幽姿不入少年場無語只淒涼一个清虛身世十分冷
澹心腸江頭月底新譜舊恨孤夢清香任是春風不管
也曾先識東皇 冬日集陳惟寅兄醉香館出示管夫
人畫梅有感題之 倪瓚

歌帽垂鞭送客回小橋流水一枝梅醉後紅綃都不記

剩有幽香却解逐人來松畔竹間頻置酒攜手與君看
到十分開少壯相從今雪鬢因甚流年清興兩相催
庚寅臘月同天台陶九成訪雲棲子於玉山草堂是日
微雪着紅梅上雲棲子見示管夫人雪梅與今日情境
適合因題一調定風波云瓊記

管仲姬着色蘭花卷

善畫蘭者故宋推子固吾元稱子昂堪為伯仲茲卷管
夫人所繪非固非昂復有一種清安逸態出人意外且

以承旨手筆六法並繆尤稱雙璧得未曾有以余仲蔚
蓬蒿而獲擊此于目頓覺埃垢盡洗五體俱香矣往復
披玩不能釋手敬識而歸之 陸源

管夫人畫竹與大士像恒多蘭亦僅見一斑今于李夢
然獲觀六種種種精妍碧葉丹英玉莖水石掩映葳蕤
荏苒恍若翩翩於湘江楚畹間幽芬可挹堪與盈川賦
子昂書爭工公其十襲秘之勿輕視俗眼也 徐緬

余家有漳蘭數十硯培之多歷年所矣每花發則燧

燈猗猗鑪薰可罷欲一寫其幽致恨無好手弄芳一
旦得管氏蘭卷正貌漳種初作兩葉一莖花漸增至
後繁英叢帶墨密間更疎秀可喜夫人其化工在握
矣余即以宋玻璃盞白玉柄紅拂水精辟邪壓繡易
之嘗攜以遊秣陵歲餘雖乏家植盈庭然時一展玩
此圖覺滿前皆九畹香也 尋香客子汪何玉識於
味蘭居

趙魏國題子仲穆畫幅

昨自杭回道經茅山西墅時夕陽欲墜松如偃蓋水若鳴
琴青山萬重白雲千頃山下有乘駿馬者出沒於其間
乃天然一圖畫心有所得以目疾未愈不能舉筆因命
子雍代之至大四年五月既望識于鷗波亭雲白山青
幾萬重溪邊遊子馬如龍眼前有景畫不盡歸去鷗波
命阿雍 子昂

壬戌之秋義興吳友攜此幅來殊堪鑒賞舫中設古
虬根榻天然無琢痕瑩潤如玉真奇物也玉水

趙仲穆自題畫黃梁夢贈張伯雨

舉世通驚夢一場何須抵死說黃梁勸君切莫頻開口
恐起癡人論短長

趙仲穆天閑騏驎枝山題

人凡十有三馬
十有六隸一

騏驎昔在人間繼在毫墨今歸吾賈君駿在君矣走千
里價千金浴瑤池而秣天山衛龍墀而驟鸞輅一旦事
耳君尚稍加剪拂以伺之因君索題為求舊跋語揭諸
前而漫贅斯說 歲丁卯夏日蘇人祝允明記

希哲

枝指 吳下
道人 阿明

騏驎驂騑世有之不逢伯樂自長嘶却憑筆貌千金骨

誰信相知是畫師 吳郡唐寅

南京
解元

畫史畫馬妙自知筆端變態毛骨竒長嘶逸步畫不出
幾番吟詠少陵詩 宗正

趙仲穆沙苑牧馬圖

着色小
橫披

沙樹歷歷沙草荒江上誰開芻牧場羣馬所聚何劬攘
飲秣而俯嘶而昂訛躋浴滾逐且驤或乳或卧或軋瘡

三縱五橫不成行五花雜沓駁而黃烏騅赤兔照夜白
連錢桃花鬪文章牝兮牡兮未可辨亦莫可識駕與良
相骨相肉信已矣老夫兩眼徒茫茫但愛各各無羈韁
自縱自得肥更光肥哉肥哉空老死未試何以知爾長
我知馬亦待駕御人馬兩得氣始揚請看滿汗流血漿
爭前欲縛左賢王追風逐電一般走五十之中當有強
右馬五十尺畫者各極其態金鑒為趙仲穆親筆而
題其上如此成化歲在乙酉十月望沈周

仙驥凡駘久混同伊誰能使翼羣空拳奇獨有青龍骨
合作觀風御史驄甲子仲呂之月吳瑄題奉全卿憲
副是月既望日

唐子華松石才子圖

絹素
掛幅

雪水唐翁鶴髮垂郭熙松石晚尤奇

關

思

誰見清吟擁鼻時
瓚題唐子華畫松石才子圖此幀

益唐君得意筆也甲寅三月拈花室中覽

子華學松雪得其華潤森鬱之氣詩有味外味稿

陸行直碧梧蒼石圖

在絹上
掛幅

候蟲淒斷人語西風岸月落沙平流水漫驚見蘆花來
鴈可憐瘦損蘭成多情因為鄉鄉只有一枝梧葉不知
多少秋聲此友人張叔夏贈余之作也余不能記憶
于至治元年仲夏廿四日戲作碧梧蒼石與治仙西窓
夜坐因語及此轉瞬二十一載今鄉鄉叔夏皆成故人
恍然如隔世事遂書於卷首以記一時之感慨云季道
陸行直題

斜陽目斷秋晚蘆花岸去信來音俱散漫陣陣新寒
驚鴈愁將梧石描成寄情只為思鄉筆下淋漓水墨滿
空雨響風聲 冶仙陸留題

柔腸先斷舟繫汾湖岸別恨離愁秋水漫寫入數行新
鴈幽閨蘭夢初成猶將小字呼卿幾點梧桐夜雨一天
霜月砧聲 梅隱王鉉題

因緣未斷江上湖平岸心事留連烟水漫愁見天邊孤
鴈買蘭和粉方成因何辜負芳卿老樹不禁風落寒猿

夜夜哀聲 元卿題

翠屏香斷夢繞瀟湘岸舊恨不禁愁汗漫分付秦箏斜
鴈吳棧賦恨難成丹青惱殺蘇卿一片碧梧蒼石誰教寫
出秋聲 仲輿葉衡謹題

西風吹斷帆迥潯陽岸水影碧涵天影漫倒印片雲孤鴈
琵琶舊譜新成舟中應有蘇卿愁耳不堪重聽聲聲又
復聲聲 德可徐再思

寸腸愁斷目送斜陽岸楓落吳江秋水漫盼殺南來征

鴈綺窓好夢初成夢回想見卿卿明月西風夜冷蒼梧
亂影多聲 竹月道人

暮雲飛斷潮落吳江岸憶昔佳人愁思漫那更樓頭聞
鴈此時有意還成爭知惱殺蘭卿畫作碧梧蒼石至今
圖得風聲 青社元卿郝貞題

楊枝歌斷春老鶯湖岸可笑楊花飛漫漫却作蘆花孤
鴈國香欲賦難成向來錯怨輕卿縱使此心如石不禁
梧葉離聲 廬山人劉則梅

琵琶絃斷冷落汾湖岸月墮湖天波汗漫空憶上林飛
鴈誰將蒼石題成才華總是冠卿翻陋梨園舊譜當年
靡靡新聲 碧梧蒼石一幅姑蘇汾湖湖天居士陸行直
甫之所作行直有家妓名卿卿者以才色見稱友人張
叔夏為作古詞贈之所謂多情因為卿卿是也後二十
一載行直以翰林典籍致政歸作此碧梧蒼石復與其
宗人冶仙話舊因記憶叔夏之贈則張公卿卿皆杳隔
塵世矣故并書張詞於卷端當時諸公仍踵而和之其

辭旨抑揚淒惋似寓乎悼惜無涯之意然自自治到今
又百餘年矣而此圖無恙墨色如新豈非有類岐陽石
鼓昭陵璽紙人人得而珍之耶鄉先生朱公暇日特示
余索賦遂書以續貂後公字孟寬號綠疇軒吾鄉詩禮
右族其風流醞藉不減行直云緩軒劉稽書

陸季道作碧梧蒼石圖蓋追寫故友張叔夏之詞意也
按季道載叔夏清平調一詞於圖右云云且識其後
曰自治月日與治仙西窓夜坐偶語及此轉瞬二十

一載卿卿叔夏皆成故人卿卿叔夏詞中云不知所
指者誰疑亦當時妓妾之類但不宜序叔夏之上元
室士大夫詩畫絕有可觀梧石清潤大似雲林蓋季
道人品亦與雲林相上下恨予生晚不能論其世徒
賞其詞畫而擊節三歎也 正統己未花朝前三日
飲桂林朱孟寬第同觀者屠冰壺陶畊學云

右四十餘載前客一清樓下寄題此畫蓋稿也頃見劉
緩軒所題誠足以啓予之寡陋丙午秋暮孟夏同一感

懷也幸喬木家遺澤尚存又寬孫綱乞予再題念諸老
故物正猶季道之念叔可為之一解頤焉 成化二十
二年九月庚申桐邨周鼎時年八十有六

張子政畫水墨梨花鳴鳩小幅

在白宋紙上

子政為文敏春雨鳴鳩圖

下有朱文守中印
又朱文張子政氏印

梨花枝上兩班班春滿西園十二闌何事錦鳩聲不絕

陰雲連日護溪山 釣鰲

一枝湘玉翠烟輕數點梨花雪色明上有鳴鳩正喚雨

江南江北動春耕

丹上樵

下有朱文
三省印

穀雨暗時鳩亂鳴
梨花枝上四三聲
春風處處催耕急
不似尋常百轉鶯
天台王俊華

一樹梨花春帶雨
闌干淚瀉玉容驚
夫不也感當時恨
應向東風叫不平
沛郡鎬翼南

風散蒼雲漾翠光
枝浮白雪濕新香
數聲催得如酥雨
只為幽姿一洗妝
四明王伯煒

東風簾捲小紅樓
三月梨花叫錦鳩
曾記玉人將鳳管

隔花低按小梁州 朱武

自解呼名繡領齊梨雲竹雨暗寒溪東風却憶江南北
桑柘邨深處處啼 吳郡梁用行

故園烟樹隔重重夢斷梨花小院空自是啼鳩心獨苦
一聲聲似怨春風 吳興孫奕

柯敬仲墨竹

石如飛白木如籀寫竹應須八法通若也有人能會此
須知書畫本來同 柯九思善畫竹石嘗自謂寫幹用

篆法寫枝用草書法寫葉用八分或用魯公撇筆法木
石用金釵股屋漏痕之遺意水晶宮道人

丹丘自題畫竹

生意滿孤根香凝粉節痕驚看雷雨夕化取老龍孫

故人能寫竹標格似湖州靜對西窓下清風滿紙秋

此首
失款

奎章閣上恣臨摹高節偏承雨露多冷澹故能追石室

蕭疎應不減東坡 張雨

楊鐵崖題柯敬仲畫

翠竹猗猗山石青
慧雲寺近浙江亭
明年我亦南屏住
林下同翻貝葉經
維禎 又題 架壑截流安尺宅
客來如入市簷壺
百年身外檇蒲局
四月山中櫻筍厨
雉雛烟叢朝日上
魚潛瓦影夕涼初
自餘眠食都忘却
更擬求觀後世書

老鐵欲求觀後世書
吾輩可失目前帙耶
乃余雖百拙惟此一勤
或亦無愧於古人歟
樂卿漫記

王若水畫虎頭鷹

若水王淵作新篁花石石上立雙鷹其雄者頭有兩角
面如怒虎脅紋繡錯可異俗名虎頭鷹卽杜工部所咏
二角鷹目如愁胡視天地也雌者則局形如雉有杉雞
竹兔俱可狎耳噫浩呼洵中有萬里之長江迴風滔日
孤光動此畫其足吞之乎 萬厯己未天中節汪砢玉
鑒藏并識

珊瑚網卷三十二

欽定四庫全書

珊瑚網卷三十三

明 汪砢玉 撰

名畫題跋九

吳仲圭草亭詩意

依村構草亭端方意匠宏林深禽鳥樂塵遠竹松清泉
石俱延賞琴書悅性情何當謝凡近任適慰平生 至
正七年丁亥冬十月為元澤戲作草亭詩意梅沙彌書

我友梅花翁巨老傳心印修此水墨緣種種得蒼潤樹
石墮筆峰造化不能吝而今橡林下我願執掃汛 後

學沈周

梅老秋江獨釣圖

空山灌木參天長野水溪橋一徑開獨把釣竿箕踞坐
白雲飛去復飛來 倪輔

秋落寒潭水更清釣竿裊裊一絲輕斜風細雨誰相問
破帽青鞋却有情 長沙李東陽

楓葉蘆花送晚晴三江秋氣逼青冥相看自信鱸魚美
不為羊裘是客星 沈周

南山舊宅早來歸紅葉蒼松白石磯今日釣魚真取適
海鷗還訝未忘機 姚綬書於水竹邨

策策霜林映水丹重重雲岫鎖輕寒西風斜日空江暮
無限秋光屬釣竿 鮑菴吳寬

木落秋容澹江空水氣寒長安有塵土不上釣魚竿

龍池彭年

梅道人臨荆浩漁父圖

與六倪齋
三刻大異

洞庭湖上晚風生，風觸湖心一葉橫。
蘭棹穩，草衣輕，只釣鱸魚不釣名。
重整絲綸欲棹船，江頭新月正明圓。
酒餅倒，岸花懸，拋却漁竿和月眠。
殘陽浦裏漾漁船，

青草湖中欲暮天，看白鳥下平川。
點破瀟湘萬里烟，

如何小小作絲綸，祇向湖中養一身。
任公子爾何人枉，

釣如山截海鱗，極浦遙看兩岸斜。
碧波微影弄晴霞，

孤舟小去無涯那，個汀洲不是家。
雪色髭鬚一老翁，

欲將短棹發長空微有雨正無風宜在五湖烟雨中

綠楊灣裏夕陽微萬里霞光浸落暉擊楫去未能歸驚

起沙鷗撲鹿飛月移山影照漁船船載山行月在前

山突兀月嬋娟一曲漁歌山月邊無船風攪長江浪攪風

魚龍混雜一川中藏深浦擊長松直待雲收月在空

舴艋為舟力幾多江頭雲雨半相和殷勤好下長波半

夜潮生不那何殘霞返照四山明雲起雲收陰復晴

風脚動浪頭生聽取虛篷夜雨聲無端垂釣空潭心

魚大船輕力不任憂傾倒繫浮沉事事從輕不要深

釣得鮮鱗拽水開綠萍漾漾逐釣來搖尾噏紅腮不

羨嚴陵坐釣臺五陵風光絕四鄰滿川鳬鴈是交親

雲觸岸浪搖身青草烟深不見人舴艋舟人無姓名

葫蘆提酒樂生平香稻飯滑蓴羹掉月穿雲任性情

桃花浪起五湖春一葉隨風萬里身釣絲細香餌勻元

來不是取魚人余昔喜關仝山水清勁可愛原其所以

出于荆浩筆法後見荆浩畫唐人漁父圖有如此製作

遂傲而為一軸流散而去今復見之乃知物有會遇時也一日維中持此卷來命識之吁昔之畫今之題殆十餘年矣流光易邁悲夫至正十二年壬辰九月廿一日梅花道人書於武塘慈雲之僧舍

漁父圖一卷唐帽者六人一坦腹伸一足坐手撫桹而不釣一立而望家欲歸一橫置桹手據船坐而回顧一俯睡倉口而身在内一睡方起出半體蓬下一坐釣而丁角者操桹在尾冠者五人坦而仰視忘所

事者卧而高枕蓬窓洞開者不釣而袖手坐者坐而釣或釣而跪者慢頭而力不勝魚撐兩足掀髯收釣者一人危坐而拽欲急歸者一人露髻而抱棹坐睡待月而後歸者一人笠而拽且髯胡者一人人自為舟獨一舟為操者焉人為志和詞一凡十六首一首注其旁曰無船吁非無船也崖樹掩之耳此梅華菴所畫詞亦其所自填非誠有其人使誠有之而詞句則一手出何耶世亦烏有若是之聚而漁皆志和之

能言也耶此卷當載之滄江主人舟古稱非梅沙彌
不能畫非丹丘主人不能有畫中意詞中景也卞民
部誦坡仙客未佳之句正桐邨牧不在坐耳牧自謂
狂不減志和丹邱以為何如立秋後八日桐邨周鼎
客雲東書時年七十有七

後有老友張萱跋
又江榮卞榮跋

余昔于戴上舍敬雲所得觀一卷景物與此正合題
云姚丹丘臨梅沙彌滄洲漁舫烟波浩淼之趣常在
夢中蓋三十年所矣今得沙彌此卷又云倣荆浩筆

而荆浩亦得自唐人乃知繪事惟創意之難如其成
就今古相師所不諱也唐人重摩詰輞川皆乞本傳
寫士大夫家有一本惟元人貴氣韻而輕位置以為
一臨倣即共生動耳姚御史名綬別號丹丘子吾郡
魏塘人半生雲水烟林不為圭組所困吾師也有一
舟名滄江虹月故周伯器跋中及之對此不能不憶
姚臨為之三嘆竹懶日華

梅花道人畫都做巨然此又自稱師荆浩蓋畫家

醞釀顧無所不能與古人為敵乃成名家也 其

昌

梅道人家武塘摹漁翁烟波景色如笠澤叢書又
以荆巨筆力出之遂成大卷就中似有張志和輩
呼之不得得此便可共逃名於菰蘆之間不復呼

漁丈人矣 陳繼儒

梅花翁山水

止見二幅在絹
素上其一題云

奉為太無鍊師觀靜堂作墨戲四幅永為青雲山中傳

諸不朽云 至正五年乙酉歲冬十月梅花道人題

又水竹山居圖

結茅山陰溪之曲最愛軒窓對修竹四時謾謾動清風
三逕蕭蕭寒玉也知一日不可無彼且惡乎免塵俗
夜深飛夢繞湘江廿五清溪秋水綠 梅道人戲作水
竹山居至正戊子

又水墨梅松蘭竹四友圖

在紙上長
卷共五段

至正六年冬至日來見古泉出此卷俾畫梅花一枝以

續歲寒相對之意也梅花老戲墨

此段想後補入
故年月在後耳

研池漠漠墨吐汁蒼髯呼風山鬼泣
濤聲破夢鐵骨冷
露影溥空翠毛濕徂徠百畝老雲烟
湖山九里甘蕭瑟
何當置此明窓前長對詩人弄寒碧
古泉講師索畫
松遂書此塞請也
梅花道人戲墨

野竹野竹絕可喜枝葉扶疎有真態
生平素守遠荆榛
走壁懸崖穿石罅虛心抱節山之阿
清風白月聊婆娑
寒梢千尺將如何渭川淇澳風烟多
至正五年乙酉

歲冬十月四日梅花道人為古泉老師戲作野竹於橡
林舊隱夢復窻下

船艖風下東吳舟枯土移入漳泉秋初疑紫筵橫翠鳳
恍如綠綬縈青虬猗猗九畹易消歇奕奕百畝多淹留
軒窻相逢與一笑交結三友成風流 梅道人戲墨

蘭題

與可畫竹不見竹東坡作詩忘此詩高麗老繭冰雪古
戲成歲寒巖壑姿紛紛蒼雪落碧篠謾謾好風扶舊枝
猗猗頭角易變化細聽夜深雷雨時 梅花道人游戲

墨池間僅五十年技止於此 古泉老師每以紙索作

墨戲勉而為之一日出此卷囑之欲補於後以供清玩
遂作以補之古泉呼童汲幽澗泉瀹鳳髓茶延之于明
碧軒焚香對坐終日略無半點俗塵浣人聊書此以識
歲月也 至正五年冬十月四日梅花道人書

嘉禾吳鎮仲圭書畫記

白文印

梅花菴

朱文印章

梅沙彌竹譜卷

詩重前題款異

文可畫竹不見竹東坡作詩忘此詩高麗老繭冰雪冷

戲寫歲寒巖壑姿紛紛着雪荷碧篠謾謾好風扶舊枝
試聽雷雨虛堂夜拔地起作蒼虬飛梅道人為可行作
竹譜時暮春三月憇於醉李春波之客舍因抽架頭之
紙隨筆為此數竿雖出一時興緒亦自有天趣可行游
研池久矣日來筆力想亦健矣他時觀此拙作亦可發
笑而已以竹譜言之則吾豈敢至正十年春三月杜鵑
花發梅道人頓首可行以為何如

嘉靖三十六年春既望墨林項元汴得于吳門文氏

又自題竹卷

墨竹位置如畫竹幹節枝葉四者若不由規矩徒費工夫終不能成畫濡墨有深淺下筆有輕重逆順往來須知去就濃淡粗細便見榮枯仍要葉葉着枝枝枝着節山谷云生枝不應節亂葉無所歸使筆筆有生意面面得自然四向團圞葉枝活動方為成竹古今作者雖多得其門者或寡不失於簡畧必失之于繁雜或根幹頗佳則枝葉謬誤或位置稍當而向背多乖方或葉似刀截

或身如板束粗俗狼籍不可勝言其間縱有稍異常流
僅能盡美於畫善良恐未暇獨文湖州挺天縱之才比
生知之聖筆如神助妙合天成馳騁於法度之中逍遙
於塵垢之外從心所欲不踰準繩故余一依其法布列
成圖庶幾後之學者不隱於俗惑云梅道人筆 後四
段各有詩一首 菲菲桃李花竟向春前開何如此君
子四時清風來 晴霏光煜煜曉日影瞳瞳為問東華
塵何如北窓風 亭亭月下陰挺挺霜中節寂寂空山

深不改四時葉
落落不對俗娟娟
淨無塵緬懷湘渭
中歲寒時相親

為松巖和上竹卷

後惠鑑跋六硯齋
三筆僅載數語

吳仲圭墨竹初學文湖州運筆雖熟而野氣終不化此
軸為松巖神師所作巖之族孫宏宗藏主請題予與仲
圭松巖皆故人也天游既久覽此不能無慨然宗雖族
孫生苦晚而不及見今寶此軸其能永恩者歟繫之以
詩懷人幾度詠淇詩空向琅玕節下題想見百年承

雨露綿綿蔭到子孫枝

湛然靜者惠鑑

又水石竹枝幅

野色入高秋寒影逝湘水日午晚風涼清風為誰起

梅道人晚興佳哉

此幅余得之青浦曹氏後以易高明水乳密紙槌瓶
歷崇禎戊辰秋見石刻仲圭墨竹八紙為李氏鑒藏
而此其一焉因憶昔年尚有梅沙彌推蓬竹亦為先
荆翁易吳益之漢玉麻姑仙并去黃鶴山樵雙筍圖

每開簾風動追憶恍然今
崇禎壬午秋得梅花老人
翠竹黃華真蹟覺頓還舊
觀凌翠漫士汪何玉

梅花菴主自題墨竹

翠羽風前葉秋聲雨一枝詩題春粉節棚脫玉嬰兒忽
見不是畫近聽疑有聲落不落對俗娟娟淨無塵吾以
墨為戲惜因墨作奴當年若莽鹵何處役潛夫色經寒
不動聲與靜相宜

只為歲寒心似鐵也宜烟雨又宜晴

我亦有亭深竹裏也思歸去聽秋聲

以上
自題

陰涼生硯池葉葉秋可數京華客夢醒一片江南雨

此鮮于學士題紙上竹愛之故錄於此耳 至正九年三

月廿九日梅道人廣輿可筆于橡林精舍

鮮籜初聞粉節香拂雲又見影蒼蒼鳳凰不至伶倫老

無奈荆榛特地長 長憶前朝李薊丘墨君天下擅風

流百年遺迹留人世寫破湘潭夢裏秋 愁來白髮三

千丈戲掃清風五百竿幸有穎奴知此意時來几上弄

清寒五月廿四日竹窻孤坐清興遄發戲寫此枝且看
果有文公法否至正十九年也

梅花和尚一葉竹

誰云古多福三莖四莖曲一葉硯池秋清風滿淇澳

至元二年冬十月廿七日奉為竹叟禪師戲作梅花道人
鎮頓首

馮司成具區與客游魏塘謁道人墓慨然慕其風致有
遺蹟零落不可多得之歎坐客有言里人藏此竹者公

訪之遂輟以贈畫舊白牋上長可三尺濶尺許餘竹梢
從左方倒垂叢條縱橫筆法清異墨葉一片綴其上長
幾三寸許真奇作也

梅沙彌寫懸崖松

偃蹇支離不耐秋搖風灑雨幾時休轉身便是青山頂
又有巖崖在上頭

又古澗長松

長松生風吹不歇古澗出泉鳴自幽玉屑飯餘移白日

紫芝歌動振高秋 雨窓禿筆無事而書仲圭

又畫菜

菜葉開干長花開黃金細直須咬到根方識淡中味

梅道人戲墨

盛子昭山水小幅

至正五年六月魏塘盛懋為士衡父造

沉冥澹天際山光遏不流松高呼落翠隱約映孤樓

應禎

題盛子昭臨彝齋三友圖

蒼髯玉骨與琅玕三友那知耐歲寒今日故園搖落盡
時時冰雪澹相看 退叟

大夫君子操調鼎味滋深歲晏冰霜冽還同鐵石心
路入東風山水涯松高竹瘦更梅花江空歲晏成三友
日暮天空共一家 潯陽鰲叟

盛子昭之姪名著字叔章能全補圖畫運筆着色與
古不殊洪武中供事內府高皇帝異之製盛叔章畫

記烟霞泉石臣玉記

劉仲賢寫應真像卷

中山劉貫道畫悉宗晉唐故其于應真人物變化態度
閒雅一展玩間恍然置身八五臺國與阿羅漢對語眉
睫鼻孔皆動真神筆也雖吳道子王瓘亦當無忝矣
茂苑文嘉題

王元章墨梅

為大父懷荆公遺
物玉幼供藤花閣

朔風吹寒水作壘梅花枝上春如海清香散作天下春

草木無名藉光彩長林大谷月色新枝南枝北清無塵
廣平心事誰與論徒以鐵石磨乾坤歲晚燕山雲渺渺
居庸古北無人到白草黃沙羊馬羣瑤樓玉殿寒花繞
凡桃俗李爭芬芳只有老梅心自常貞姿燦燦眩以玉
正色凜凜欺風霜轉身西冷隔寒霧欲問逋仙杳無所
夜深湖上酒船歸長嘯一聲雙鶴舞 王冕元章

題顏秋月寫鍾馗圖後

沙公彥德挾張華之識尤能精鑒古人名畫凡入神品

者靡不購得之而拙工摸倣形似者不能以欺其明焉
故家藏唐宋元三代名蹟甚富士大夫之好畫者必先
經彥德鑒定而後收蓄以是人益器重之今夏隆暑中
彥德持一卷示余曰此顏秋月所繪鍾進士元夜出遊
圖也披而觀之乃寫衆鬼作小隊前導有鳴金者有擎
大石者有顛立而欲飲者有肘甕而行者有持鎗者有
揮刃者有舞盾者有卓大刀者有執壺漿者有捧觴進
者有負椅者有攜琴書筆硯者鍾馗於後三鬼載之而

行又數鬼擁從有張蓋者鳴鼓者吹笛擊板者詭態異狀各盡形勢彥德求余題其後余聞世傳鍾馗者終南人也不第而死階下因以進士袍笏賜之既而示形於玄宗夢中曰臣當為陛下除天下虛耗之孽今是圖也其所謂夢中者耶且鬼神無形視之不見何其有形之若是耶豈畫者揚其巧擅其妙窮其怪狀而其實無有耶終南進士死有靈爽尚為天下翦除妖孽彼明為人者視此圖寧不惕然驚省哉然則良工用心之苦

蓋有諷于世道者深矣 洪武己巳歲夏六月紫芝

山人識

顏秋月名輝元之江山人生而穎敏有儒者風度善畫
道釋人物嘗死而復生故畫鬼尤工茲卷為老魃元夜
出游圖筆法奇絕有八面生意展開間令人駭目非深
得造化之妙者曷克臻此當珍如拱璧世守勿失 延
陵吳寬

馬文璧倣巨然秋巒烟樹

款云文璧
為吳齊作

樹沉沉兮獨古山藹藹兮相雄思石梁兮徑度枕陰磳
兮多風雪泉先生出此畫徵題時朱旦方有執熱之
嘆故云馬治壬戌夏五月廿又五日

泉潺潺兮作壑嵐霏霏兮欲雨望江南兮嘆歸與悵媿
人兮何許時亨李進士以高孝先生題畫詞徵和
為太祖九十三年後甲午乃成化十年也閏六月十一日
亦執熱而書云後學張弼

楊鐵崖題為文璧瀛海圖

山頭朱閣與雲連山下長江浪接天
若待桃花春水漲美人天上坐樓船
抱遺叟

曹知白雪關雲棧單條

雲西老人戊子之夏五月既望為士英作雪關雲棧時

年七十七歲

有以自玩世之
候朱文餘朱文

曹雲西江山長卷

至正壬辰清和月雲西老人曹知白寫贈同菴老友

至正壬辰初夏寓上朔迴龍寺適雲西老人來聯榻

數日值景清和或拄策喬林或放船幽渚江山延人
佳思花月助我閒吟漫賦山居十首呈正雲西亦記圖
所歷為江山長卷見贈投磚引玉深愧鄙俚因附錄
卷尾以識一時之雅會云 天地存吾道山林老更
親閒時開碧眼一望盡黃塵喜得無生意消磨有漏
身幾多隨幻影都是去來人 髮不如心白形還似
木枯衆緣閑處盡一念看來孤天已容疎拙禪應離
有無餘生當落日步步是歸途 生理元無住流光

不可扳誰將新日月換却舊容顏獨坐惟聽鳥開門
但見山幻緣消歇盡不必更求閒 混世多生厭歸
山念自休幾曾千載計特為一人留浩浩成空劫涓
涓積巨流但觀清淨理一切總如浮 身已難憑藉
支離各有因暫時連四大終是聚微塵萬籟含虛寂
諸緣露本真從來聲色裏迷誤許多人 斗大一菴
居其中任卷舒雲霞生戶牖星月挂庭除念息心愈
寂塵消境自如南薰時一至颯颯六窓虛 飯食無

餘事高眠晝不分
晦明殊自覺
鐘鼓幾曾聞
四面幃
青嶂和身卧
白雲誰言茶力健
能遣睡魔軍
無意
人間世遊神
極樂天
惟餘可漏子
不放拍盲禪
獨羨
搏風翼
堪多出水蓮
回觀塵土客
誰不為纏眠
一
性原無着
何為示自由
祇因生管帶
故被世遷流
不
識空花影
堪憐大海漚
但開清淨眼
明見一毛頭
揮塵元吾事
閒心奈嬾何
聊將精進力
調伏睡眠魔
寂寂吹天籟
悠悠逝水波
從來無一事
應不怪維摩

南屏山人同菴夷簡

松門

曹真素山水軸

小清秘閣藏

雲西為明叔作重溪暮藹

雲老與僕年相若執筆濡墨既有年矣老而益進於今
諸名勝善畫家求之乃畫者甚多至于韻度清越則此
翁當獨步也 至正九年五月廿五日大癡學人公望
題識時年八十又一

雲西吾松之湏溪人與倪迂大癡以畫相倡和勝國

之末高人多隱於畫雲西為多田翁蓋其家足置鄭
莊之驛以延款名勝者 其昌題

秋林亭子

款云雲西老人曹知白為
月屋先生作又題一絕

天風起長林萬影弄秋色幽人期不來空亭倚蘿薜

題曹雲西山水

旭日耀蒼巘翠嵐生嫩寒幽人詩夢醒清響得松湍

會稽王元章

烟鐘隱隱起蒼茫嶺日分輝到草堂昨夜前山春雨過

小橋流水落花香 會稽全美

碧雲消盡好山多 茆屋春深長薜蘿
行處聽來心自慙 野禽啼罷野樵歌
巽志生劉宗器

筆底江山不露鋒 茅茨十尺倚長松
採芝空谷歸來晚 知在晴雲第幾重
遂昌山人 鄭明德印

晴旭流輝耀翠微 蘿烟開處啓荆扉
澗橋兩兩提筐子 疑在深林採藥歸
武林顧易

黃公望溪山雨意

文壽承大篆書卷首

此是僕數年前寓平江光孝時陸明本將紙二幅用大陀石硯郭忠厚墨一時信手作之此紙未畢已為好事者取去今復為世長所得至正四年十月來溪上足其意時年七十有六是歲十一月哉生明識

黃氏子
久白文

黃公望
印朱文

青山不趁江流去數點翠微林際雨漁屋遠模糊烟村半有無大癡飛醉墨秋與天爭碧淨洗綺羅塵一巢棲亂雲調寄菩薩蠻筠菴王國器題

黃翁子久雖不能夢見房山鷗波要亦非近世畫手
可及此卷尤其得意者甲寅春倪瓚題

黃子久層巒積翠

至正七年正月上澣大癡道人為道玄處士作于草堂
時年七十有九

崇禎辛未重九日王越石持倪黃二畫來倪畫人物
古雅樹石蒼秀世謂畫人止龍門僧一幅及不用圖
書殆虛語耳大癡筆法尤古與荆巨頡頏矣 長翟

國派苔石一人識于釣雪蓬

子久騎馬看山圖

參卿昔在西安幙騎馬看山時出郭終南泰華勢最高
橫作秋雲掃寥廓秦川漢苑萬里開酒醒望遠登荒臺
日斜渭上歸人渡嶽暗關中飛雨來此處奇觀絕天下
何事歸來猶看畫畫中小景似江南黃葉漁村見烟舍
莫戀江南真故鄉尊鱸煖熟酒船香美人不是滄洲客
此去宜登白玉堂東吳青丘子題

此黃子久學董北苑之筆其家有鐵崖圖似之其昌
大癡畫獨此最稱澹蕩洗盡畫家縱橫習氣又在鐵
崖上眉公

黃大癡縹緲仙居圖

玉觀仙臺紫霧高背騎丹鳳恣遊遨雙成不喚吹簫侶
閨苑春深醉碧桃 至正己亥三月十五日過張外史
山居觀此圖遂題一絕 丹丘柯九思

山在白雲中草樹發青紅縹緲神仙居隱現金銀宮飛

霞隔鸞鶴叢篁思閬風誰從此招手度我逍遙翁 楊

載題

水紋風縐花影月翻此不染畫世也觀大癡畫不當
于筆墨中求之壬子夏舟次荷葉汪砢玉題

此圖余攜白下東倉楊汝邁見而愛之別後汝邁遙
將紫筠筐一隻內盛弇州四部稿正續及敬美奉常
稿又古玉名磁種種余因舉圖酬焉玉追記

黃子久淺絳色山水

至正九年四月一日大癡

曲曲溪流響夕輝
杜鵑啼老落花稀
為問連朝何處去
篩箕泉下得圖歸
風月福人

鳥啄殘花污草菴
一春來到兩山探
忽觀癡老圖中道
南峰翠帶北峰嵐
閒閒

畫家初以古人為師
復以造物為師
向見黃子久天池圖
為贗本
去年遊吳中山
策筇石壁下
快心洞目狂呼
曰黃石公黃石公
同遊者不測余
曰今日遇吾師耳
觀此因追憶書之
其昌

又子久山水

井西道人壺中仙拔足昔走江南天一丘一壑寫高古
三江三泖來盤旋廬子渡頭小茅屋墜田堆畔靈芝田
能令寸筆涵萬化穀城黃石同其傳林泉民張夢辰

子久論畫凡破墨須由淡入濃此圖曲盡其致平淡
天真從已然風韻中來余家所藏富春山卷正可與
同參也 甲寅春三月董其昌題

一峯道人秋山林木

誰家亭子傍溪灣
高樹扶疎出石間
落葉盡隨溪雨去
只留秋色滿空山
大癡道人作

大癡學北苑多作森梢勁挺之樹
老杜云請君放筆為直幹
此圖是矣
玄宰觀于東雅堂因題

謝伯誠焦墨山水

下有高士紅衣
素裳立雙松間

任易謝伯誠畫法絕軼得董北苑風致
今觀瀑布圖飄飄然有凌雲氣
余為題詩其上云
銀河忽如瓠子決
瀉諸五老之峰前
象疑天孫織素練
素練脫軸垂青天

便欲手借并州剪剪取一幅玻瓈烟相逢雲石子有似
捉月仙酒喉無奈夜渴甚騎鯉吸海枯桑田居然化作
十萬丈玉虹倒掛清冷淵鐵笛在快雪樓試葉茂實
墨時奉熙春閣硯小凌波也

陸天游谿山清眺

古秀汪氏
合璧鑒藏

陸天游畫一幅好事者離為二軸玉水先得一幅凡十
餘年又得其副遂若雌雄之劍復聚延津亦奇矣過長
水鑒賞永日因題此以俟觀者 董其昌

陸天游畫品在幼文雲西間以蕭散幽澹為宗若潤幅
雄肆之筆絕不易得也玉水此幅乃聯素為之者先得
其左復得其右眇然延津之合也大竒大竒日華

余弄鴈車時家甫得陸天游畫上題云谿山清眺陸
廣為文伯作時父執吳功甫嘗過吾家凝霞閣極鑒
賞此幅然惜其非全璧也至甲寅秋高友明水見之
以天然花影棐几相易迨己未春潤州繆杞亭持二
畫來適董元宰先生過訪展閱間咤之曰何一軸而

離為二也余相較曰何二幅而一為余家物也杞亭云為文伯作者得之此地高氏歟天游生者得之茗上閔氏初不知其相合也即舉以歸余元宰遂索紙題之玄宰又云天游生歟是原筆也而裝潢者湯玉林陸象元在舍即揭投水池前歟便洗去後歟揉素至碎字蹟終不脫於此徵太史善鑒并憶昔年功甫之論不謬也若畫中層巒疊嶂殿宇樓臺出沒烟雲間溪橋橫亘其下草樹滄鬱掩映其憑高者有振衣

千仞之上其入林者有平巖物外之趣回視各半時
殘山剩水作缺陷世界者忽得女媧氏補之頓成中
央大庭之天矣後之人宜世守勿失庶留此一段嘉
話秀水汪硯玉樂卿甫識于漱六齋

張伯雨山水

谷翁真人當至元之初與趙榮祿相交多得其書畫往
往散逸其存者不過十之一也我友養玄道人盡以出
示稱嘆竟日戲寫此圖於靈石軒中正戊子九月廿

又三日張雨

張貞居高逸振世文絕詩清韜光山水間默契神會
點染不羣然懶於應酬遺畫甚少余曩在梁溪周子
仲處曾見靈峯山寺圖則逸而簡吾郡徐君美家見
擬蘇長公竹石則秀而奇餘未嘗見也今觀此圖筆
力圓潤高古驚人其山頽突其樹縱橫大得董北苑
之意即同黃王不能措手其氣韻蒼兀不遜趙榮
祿宜乎飄飄然若羽化而登仙也錦川老人王瑞

書於芝溪草堂

昔張伯雨寄陳惟寅雙峯含翠圖高拱辰畫錄所載
之詩黃篋樓中唯飲酒白雲廊下且題詩閒時描得
雙峯寄變幻青山是我師世稱伯雨善畫予未嘗見
今窺此圖令我駭目用筆古雅深得六朝氣韻借使
北苑復生不能為也古松道人題於鶴翅舟中

此一段題

於畫外
楷絹上

此圖筆力高古未見其匹倪迂當拜下風矣太平清

話張伯雨素不善畫嘗醉寫奇石具一種逸韻若見此圖定無此語 閑止居士雨窓漫書

張貞居潯陽歸興

有巾者締有杖者藜千載高風邈焉難追東籬之菊西山之薇益異世而同歸者歟句曲外史為劉淵畫

右潯陽歸興卷乃淵明歸休之圖而平江陳公立卿之所家藏者也公雖武弁而博雅好古

失款

方方壺雲林圖

方壺為太樸老友作至元四年戊寅歲四月記

故人渺在雲林端手植梓漆陰團團不憤讀書從鬼谷
何言賣藥近長安白日定趨天祿閣青春宜著鷄鵲冠
相思灑盡金壺墨三十六峯生暮寒 句曲外史張天
雨

仙人危太樸屏迹雲林間河車運金液九轉成大還苦
辛三十載得道鬢已斑弱水政清淺蓬萊那可扳嬌娥
貯金屋霜露零秋山勿猜松柏操不及桃李顏 丹丘

生柯九思題

抱朴先生學大還偶然為客未歸山迎陽館裏看圖畫
夢繞白雲青樹間東陽吳師道

海上三山樓觀開壺仙早晚御風回畫成定勝人間景
為問何人寄得來

雲林之高峰可望日出海君子居其間旦起餐沆瀣三
年毛骨換九載神色改翩然升雲去鸞鳳翳五彩山中
有神藥服食多所採寄語學仙人佇以立相待 邵菴

虞集

方上清碧水丹山

紙上水
墨掛幅

岸花汀鳥留幽意碧水丹山共隱情
方壺作于金門
之小洞天

溪亭風致似蓬瀛古木寒泉也自清
一笑相逢共忘世
此身何用絆浮名
大年

地濶紅塵遠天空碧嶂遙有心懷往古無計避喧囂
坐
久閑情適談諧逸興飄卜鄰如可遂林下卧吹簫
會

稽表銘

幽亭寂寂遠紅塵
簾外東風柳色新
四海雍熙春晝永
水邊林下屬閒人
月林張九芳

方壺畫家甫得之吳功甫
功甫為冢宰黜泉公孫博
雅豪邁共宋几元羽皇
習業嘉樹堂余嘗與其社
課而功甫以餘閑交易古
玩家甫曾購其饕餮鼎花
紋粗細相壓飛翠襲人
每以供此畫商周法物正
宜享上清於雲半詎意丙
辰冬鄰人不戒于火延藝
吾家

凝霞閣畫首亦燎去得蒼頭舉官硯惠泉一潑而熄
至明付陸象玄裝潢竟遺失水池一宿化為烏有豈
上清神丹餘紙故入水火二煉耶抑功甫仙遊所及
復收還芙蓉城耶可憾也 萬曆丁巳春玉水汪硯
玉識於花嘆齋

珊瑚網卷三十三